

念佛圓通章日誦式 (依續法法師疏鈔)

南無本師釋迦牟尼佛 (三稱)

無上甚深微妙法 百千萬劫難遭遇
我今見聞得受持 願解如來真實義

大佛頂首楞嚴經大勢至菩薩念佛圓通章

大勢至法王子、與其同倫、五十二菩薩、即從座起。頂禮佛足、而白佛言。我憶往昔、恆河沙劫。有佛出世、名無量光。十二如來、相繼一劫。其最後佛、名超日月光。彼佛教我、念佛三昧。譬如有人、一專為憶、一人專忘。如是二人、若逢不逢、或見非見。二人相憶、二憶念深。如是乃至從生至生、同於形影、不相乖異。十方如來、憐念眾生。如母憶子。若子逃逝、雖憶何為。子若憶母、如母憶時。母子歷生、不相違遠。若眾生心、憶佛念佛。現前當來、必定見佛。去佛不遠。不假方便、自得心開。如染香人、身有香氣。此則名曰、香光莊嚴。我本因地、以念佛心、入無生忍。今於此界、攝念佛人、歸於淨土。佛問圓通、我無選擇。都攝六根。淨念相繼。得三摩地。斯為第一。

往生咒

南無阿彌多婆夜、哆他伽哆夜、哆地夜他、阿彌利都婆毘、阿彌利哆、悉耽婆毘、阿彌利哆、毘迦蘭諦、阿彌利哆、毘迦蘭哆、伽彌膩、伽伽那、枳多迦隸、莎婆訶 (三或七或廿一遍。)

讚佛偈

阿彌陀佛身金色 相好光明無等倫
白毫宛轉五須彌 紺目澄清四大海
光中化佛無數億 化菩薩眾亦無邊
四十八願度眾生 九品咸令登彼岸

南無西方極樂世界大慈大悲阿彌陀佛 (百千萬聲隨意)

南無觀世音菩薩 南無大勢至菩薩 南無清淨大海眾菩薩 (各十稱)

發願回向偈

我今稱念阿彌陀。真實功德佛名號。惟願慈悲哀攝受。證知懺悔及所願。往昔所造諸惡業。皆由無始貪瞋癡。從身語意之所生。一切我今皆懺悔。願我臨欲命終時。盡除一切諸障礙。面見彼佛阿彌陀。即得往生安樂剎。願以此功德。莊嚴佛淨土。上報四重恩。下濟三途苦。若有見聞者。悉發菩提心。盡此一報身。同生極樂國。十方三世一切佛。一切菩薩摩訶薩。摩訶般若波羅密。(一遍。三禮而退。)

首楞嚴經灌頂疏卷第五下

浙水西陵慈雲寺教觀沙門 灌頂續法 集并註
龍山東臯崇福寺旭洳沙門 心蓮 證文較編定

△丑七。勢至根大悟入三。寅初。作禮陳白。

大勢至法王子。與其同倫。五十二菩薩。即從座起。頂禮佛足。而白佛言。

梵語摩訶那鉢。此云大勢至。觀經云。見此菩薩一毛孔光。即見十方無量諸佛淨妙光明。是故名無邊光。以智慧光普照一切。令離三途。得無上力。是故名大勢至。思益云。我投足處。震動三千大千世界及魔宮殿。故名大勢至。無量壽經云。大勢至菩薩。於是西方安樂國土。修菩薩行。命終轉化。生彼佛國。悲華云。願我世界如觀世音。等無有異。寶藏佛言。由汝願取大千世界。今當字汝為大勢至。法華經中名得大勢。法王子者。今在樂國。居佛座右。輔化一切。次補佛處故。倫者。輩。序。等。類也。同者。易謂同人同心。同聲氣等。五倫中親友類也。法表人法。教義。行位。境智。因果。體用。理事。依正。逆順。應感。皆同等也。五十二者。表信住等五十二位。皆當念佛。成佛道故。

△寅二。述悟入因。

我憶往昔。恒河沙劫。有佛出世。名無量光。十二如來。相繼一劫。其最後佛。名超日月光。

一遇佛授教。二。先敘佛出興。往昔。揀今現在彌陀。無量光者。起信論云。身有無量色相好光。觀經云。八萬四千相好。各有八萬四千光明。徧照十方世界念佛眾生。攝受不捨。十二者。大本云無量光。無邊光。無礙光。無對光。燄王光。清淨光。歡喜光。智慧光。不斷光。難思光。無稱光。超日月光。師資一道。古今不異。故俱曰光。止十二者。表十二時。念十二佛。轉十二類生。而成十二聖果也。

彼佛教我。念佛三昧。

彼下。二教修念佛。彼佛。十二佛也。指示曰教。念佛者。事則一心憶轉曰念。三身覺悟曰佛。能所不二。故曰念佛。理則念即始覺。佛即本覺。始本合一。名為念佛。法門有四：一持名。二觀像。三觀想。四實相。清涼開五：一緣想境界念佛。二攝境惟心念佛。三心境無礙。四心境俱泯。五重重無盡念佛。今此四五

並通。約機。惟局持念緣境。觀經云。諸佛如來是法界身。入一切眾生心想中。是故汝等心想佛時。是心即是三十二相。八十隨形好。是心作佛。是心是佛。諸佛正徧知海。從心想生。是故應當一心繫念。諦觀彼佛。此乃念佛要宗旨也。三昧。此云正定。亦云正思惟。是禪觀通名。念佛。是一行別目。亦名般舟。普等。諸佛現前。妙嚴品云。念佛三昧。名無邊海藏門。清涼疏云。念佛三昧。菩薩之父。乃至十地不離念佛。

譬如有人。一專為憶。一人專忘。如是二人。若逢不逢。或見非見。

譬下。二依教行持。二。先舉二人喻感應。初喻單憶。離而無益。有人。生佛二人也。一專。佛念眾生也。一忘。生不念佛也。逢見者。佛現眾生前也。眾生心即佛故。不逢見者。眾生無緣見也。妄想業障故。

二人相憶。二憶念深。如是乃至。從生至生。同於形影。不相乖異。

二人下。二喻雙憶。合而有益。相憶。生佛念同也。念深。久憶不忘也。如是。結指詞。真如理合曰如。依是事念曰是。謂能如是念佛。則決定時時常相見也。乃至。超略詞。意含時日月歲。一期三世十生等。不乖異者。謂彼此相應。毫無違悖也。形影者。一喻不離。形必有影。如聲響鏡光。二喻無違。形端影正。如稻種豆芽。下云。容貌如佛。心相亦同。謂生生世世。在在處處。猶如形影水波。不相捨離。而無乖違也。

十方如來。憐念眾生。如母憶子。若子逃逝。雖憶何為。

十方下。後以母子合道交。初合單憶。離而無感。上喻泛指親友。此則的喻母子。諸佛。父母也。菩薩。兄長也。眾生。子弟也。初三句。合一人專憶。如母憶者。經云。父母念子。慈止一世。佛念眾生。慈心無盡。世世相隨。次二句。合一人專忘。逃逝。合眾生不念佛。而流轉六道苦也。何為。合如來單憶無益也。

子若憶母。如母憶時。母子歷生。不相違遠。

子若下。二合雙憶。同而有應。初二句。合相憶念深。經云。寧在三惡道。得聞念佛名。故阿鼻遇佛光觸。頓升兜率而超十地也。次二句。合生生不異。阿鼻往升。況善道耶。能精勤念。感應自然。心佛眾生。形影一同。生處豈有不同也哉。行願品云。所有與我同行者。於一切處同集會。身口意業皆同等。

若眾生心。憶佛念佛。現前當來。必定見佛。

若眾下。三修因證果。二。先通明他念益。二。初必定見佛益。此以法說。對

前喻合二中雙憶不離意也。心者。謂事一心。理一心。揀非口念而心不念也。記持不忘曰憶。繫緣無間曰念。事則專心注意。毫無雜緣。理則惟妙覺明。圓照法界。佛亦有二。事相即是三身等佛。理性即是一真法界。又心憶念佛名。亦有五種：一憶念佛名門。二攝名歸心門。三心名雙融門。四心名俱絕門。五圓通無盡門。現當定見佛者。起信論云。凡夫二乘。心所見者。依於事識。名為應身。初發意菩薩等。心所見者。依於業識。名為報身。入法身位菩薩心所見者。依真如心。名為法身。既隨心識。現當必見。華嚴德雲告善財言。善男子。我惟得此憶念一切諸佛境界。智慧光明普見法門。又事則七日念佛功成。或於禪定中見。或於睡夢中見。此乃現在見也。一生念佛功就。或於臨終見佛。或於花臺見佛。此是當來見也。理則即心即佛。即佛即心。心佛圓融。法界無盡。隨時隨處。十佛齊現。何揀現當而云定見。如解脫長者。要見即見。是也。

去佛不遠。不假方便。自得心開。

去佛下。二速得開心益。先舉法。不遠者。事則定夢。花池已見故。理則心佛相即。本覺佛故。方便者。有二。一餘方便。謂戒律執心通達。或禪觀了悟自心。經教見性明心。或苦行徹心。禮誦證心。二即念佛三昧。信論云。如來有勝方便。專意念佛。心即一旦豁然貫通。不假心開者。今但自以念佛。心得開通。不假餘諸方便而得心開悟也。古云。但得見彌陀。何愁不開悟。

如染香人。身有香氣。此則名曰。香光莊嚴。

如下。次喻明。二。先香熏。事則佛法身香。理則真如心香。信論云。若人以香而熏習故。則有香氣。今則但以真如而熏習故。則有淨用。此則下。次出名。香喻禪觀。光喻智慧。身近佛身。心開佛心。合喻中人得如來法身香光。莊嚴自心本覺如來。恒沙性德香光色也。又以三業明之。意則菩提心香。佛知見香。正助道品、十二緣觀、六度心香。一切般若波羅蜜香。身則五分香光。十佛香光。八萬四千相好香光。三十二相隨好香光。法身常住香光。六根清淨香光。口則說諸佛法香光。五戒十善六念香光。百法明門香光。十波羅蜜無盡香光。力無所畏不共香光。三業皆佛。故香光嚴。

我本因地。以念佛心。入無生忍。

我本下。次別出自行益。二。初自利。本因。因也。無生。果也。佛心。該因徹果。彌陀經明三忍。一音響忍。二柔順忍。三無生法忍。華嚴明十忍。仁王五

忍等。今則念而無念。無生也。佛而無佛。無法也。無念心。無佛心。生法俱無也。得證曰入。理智曰忍。慧心安此無生法理。名入無生法忍。

今於此界。攝念佛人。歸於淨土。

今於下。次利他。此界。娑婆五濁苦界。淨土。安養五清樂國。攝者。持也。結也。生前以威德力持。令不退念。臨終以願行力持。令得往生。歸者。回也。還也。此界如旅亭。彼土是家鄉。喻如有人因事遠遊。未得歸還。今遇親友指示家鄉。速回本地也。攝。能接勢至。人。所引行人。又人能歸。土所歸。理則心穢。則此土穢。心淨。則彼土淨。心迷則淪此界。心悟則生彼國。心妄則遠不見佛。心真則近攝見佛。念佛。法也。憶想外境念佛。歸見變化土佛。得小勢至力也。攝境歸心念佛。回見劣受用土佛。得始勢至力也。心境互融念佛。生見勝受用土佛。得終勢至力也。心境雙泯念佛。還見法性土佛。得頓勢至力也。圓通無盡念佛。親見法界土佛。得圓勢至力也。至於一念十念。一七七七。一日九十日。三輩九品得往生者。或冥或顯。皆蒙勢至等三聖。威德願力所攝歸也。又淨土。顯今現在彌陀佛土。揀非昔之十二佛土。稱理古今亦通。

△寅三。結答圓通。

佛問圓通。我無選擇。都攝六根。淨念相繼。得三摩地。斯為第一。

我下。因也。得句。果也。無選擇。二意：一揀非那律選眼。空生擇意。二外不選六根相浮勝二相。內不擇六根性見聞等性。根都攝者。亦二義：一眼不取色。乃至意不緣法。二惟依一精明心。不行六根用故。餘念不生曰淨。念而無念故。一心繫佛曰念。無念而念故。謂念佛時。非用眼等六識分別而念。乃是六根都攝。毫無分別。一心不亂念也。相繼者。事則憶念無斷。理則圓照無間。得。圓證也。三摩地。翻等持。或等至。事則成念佛三昧。理則圓妙覺佛地。斯第一者。含三意：一文殊謂念性生滅。因果殊感。故第二。勢至謂一心淨念現見自佛。故第一。二阿難循聲。故返聞為當根。念佛為不當根。佛以聖性皆通。歸元無二。故稱觀音勢至並無優劣。三此方教體在於音聞。故以耳根圓通當此方機。勢至居次。十方法門。念佛為最。故以念佛圓通當十方機。等於觀音。又事念他佛。助顯本覺性佛。則次泥洹。異於觀音。理念自佛。直顯涅槃心佛。則等泥洹。同觀音矣。所謂不假方便。自得心開。何為不第一耶。

四門略結。教我三昧。教也。憶佛念佛。行也。自得心開。理也。入忍歸土。

果也。詳配述之。彼佛教我。小教。心憶念佛。始教。心開見佛。終教。入無生忍。頓教。歸十佛土。圓教也。念佛三昧。是心是佛觀。彼佛教我。自覺行也。二憶念深。是心作佛觀。不相乖異。覺他行也。念心入忍。法界性佛觀。圓覺行也。入忍。權果。歸土。實果。得三摩地。權實該徹果也。教我三昧。佛即是心法界。性佛真空也。同於形影。心即是佛法界。性空真佛也。入忍歸土。心佛圓融法界。清淨周徧。隨心應量也。又形影不異。有為法界。心開入忍。無為法界。三摩第一。無障礙法界。皆理也。又約十玄。隨文明之。十二佛出。一總名光。一多相容門也。彼十二佛。教我念佛。主伴圓明門也。一憶一忘。或見不見。隱顯俱成門也。生佛相憶。同於形影。因陀羅網門也。母子歷生。不相違遠。廣狹無礙門也。現前當來。必定見佛。十世異成門也。自得心開。香光嚴身。諸法相即門也。以念佛心。入無生忍。托事顯法門也。攝此界人。歸於淨土。微細安立門也。六根都念。三摩第一。同時具足門也。五教十玄俱具。十方三輩並攝。眼見根等圓通。念佛都攝第一矣。

問：與前四科七大。義旨別否？答：別意有三：一前約法說。此就人明。二前屬見解。今局修證。三前依世間有為虛妄法相。而會出世如來藏真如法性。今準權小法門事相。而通圓頓實中法界藏心理性。故先後文義。各不同也。正脈云。六塵先聲後耳者。一此方教體在音聞故。二權小多循音教。圓實直返聞性故。七大先火者。為警多聞人。首應除欲漏。後於根大者。一會識相歸根性。二彌勒兜率內院。終不及彌陀樂土。觀音性地也。

文句云。念佛有三：一念自佛。六根為所觀。妙觀察智為能觀。二念他佛。須兩重能所。察智為能觀。六根為所觀。同前一重能所。又六根為能念。諸佛果德為所念。由第六識。夾持六根。專注佛境。此則該攝事想法門。罄無不盡。三自他俱念。了知心佛眾生三無差別。自他本自不二。乃托他佛以顯本性。托外義成。惟心觀立。

釋曰。此實捷徑法門。反成迂曲道路。何者？以妄立能所。虛開境觀。沉復因果並昧。王所錯會。根識不分。性相俱迷者也。彼云。四種念佛俱通。何局觀像觀想。今重觀境。一謬也。又持名實相。何多能所。二謬也。妙觀察智。六識轉成。今輒立用。不一心念。豈非昧因瞢果。三謬也。察智。六識心王轉。念慧乃心所法。今既不明。王所錯說。四謬也。彼云。察智為能。四智菩提佛果為所。

識也。分別。生滅。經云。六根都攝。根也。無分別。不生滅。根識不明。何云通教。五謬也。彼云。憶者恒審思量。念者注心一境。又云。托外義成。惟心觀立。八識。有為相也。經云。若眾生心。憶佛念佛。自得心開。身有香光。念佛三昧得成。無生法忍入也。此勢至案。與前彌勒惟心識定各別。前屬八識相宗。此屬藏心性宗。性相雙迷。六謬也。彼云。但念他佛。得非心外取境。須知圓人。熾然但念他佛。了知他佛不離自心。權乘從未了達自心。究竟心外決無別佛。理實心外自有彌陀。既有內外自他二別。何能一如不異。七謬也。彼云。念自佛。六根為所觀。相宗六根屬色。何為自佛。經云。六根攝念。云何為所。八謬也。念他佛。立四能所。自他罔分。境觀難辯。彼說由第六識。夾持六根。專注佛境。此則第六識念。亦非六根都攝淨念。九謬也。自他俱念中云。心佛眾生。三無差別。乃托他佛以顯本性。知本性明。惟心觀立。心自不念。何益之有。又云。諸佛乃眾生心內之佛。眾生乃諸佛心內眾生。義意同上。生心既不念佛。猶本覺佛。無始覺念。生佛元異。何能始本合一。究成妙覺佛哉。十謬也。如此釋文。淆訛不定。非法非義。非正非真。

今依性相五教而判釋之。先相宗：一念他佛。六識心念。他方如來。八識中佛。小教也。二念自佛。謂六識心。念自證分佛。始教也。三自他佛雙融念。謂六識見分心。念自證分佛。并念第八識中。三分法報化佛。彌勒云。得成識心三昧。心變如來國土。終教也。四自他佛俱泯念。謂六識見分心。念自證分佛。攝歸證自證分。并念第八識心三分佛。亦歸八識證自證分。離識性外。無別佛土。彌勒云。我了惟心識故。識性流出無量如來。頓教也。五念自他融泯圓通。無盡法界佛。謂六識見分心。念自三分佛。并念八識四分諸佛。彼此互融無盡。彌勒云。十方惟識。識心圓明。入圓成實。前識大云。如來藏中。性識明知。徧周法界。含吐十虛。圓教也。此是彌勒識心三昧念佛法也。故行願品。彌勒引念佛人。往生彌陀佛土。

次性宗：一念他佛。謂六根都攝。淨念他方如來藏心佛。勢至云。二憶念深。同於形影。觀經云。諸佛如來是法界身。入一切眾生心想中。小教也。二念自佛。謂六用不行。及流全一。名攝六根。念自藏心佛。勢至云。生心念佛。現當見佛。觀經云。汝等心想佛時。是心即佛相好。始教也。三自他佛雙融念。眾生六根無分別性。與如來藏圓明心性。無二無別。眾生一念佛時。佛即現生心內。央掘云。

所謂眼意根。於諸如來常具足無減修。了了知見等。勢至云。自得心開。身染佛香。觀經云。是心作佛。終教也。四自他佛俱泯念。六根脫黏內伏。伏歸元真。發本明耀。不起知見。知見無見。斯即涅槃。云何是中。更容他佛。此名俱泯念佛。勢至云。以念佛心。入無生忍。觀經云。是心是佛。華嚴云。知一切法。即心自性。成佛慧身。不由他悟。頓教也。五念自他無盡法界佛。華嚴云。菩薩知自心。念念常有佛成正覺。如自心。一切眾生心亦如是。故六根念時。根根盡佛。念念俱佛。人人是佛。處處皆佛。勢至云。六根都念。得三摩地。攝此界人。歸彼佛土。觀經云。諸佛徧知海。從心想生。前云。如來藏中。性見覺明。周徧法界。圓滿十虛。圓教也。

此是勢至三昧法也。彌勒勢至。圓通固等。根識二大。法義自別。故於此未重為分辯。苟於旋湛。不起分別。隨根隨識。悉圓通矣。何優劣之有哉。